



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

Name of School : 香海正覺蓮社佛教正慧小學
學校名稱 : HHCKLA BUDDHIST WISDOM PRIMARY SCHOOL
Name of Play 劇名 : 比魔法更重要的「魔法」
Script writer 劇作者 : 莫翠娟老師

Synopsis 故事大綱：

魔法，是動畫、電影中充滿奇幻色彩的技能？是勇者歷險後召喚出來的魔法？是只存活在傳說中的力量？只是一種信仰？還是……

一班魔法研究學會的學生，對魔法充滿熱誠，各人對魔法卻有獨立的見解。得知魔法師出現的消息，眾人想前往學習魔法，但真正的魔法到底是甚麼？他們最終收穫的又是怎樣的「魔法」？



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

第一場：魔法研究學會

(眾人各自研究魔法，睇書、討論、摸水晶球、兩隻手指指太陽穴練念力、用魔杖訓練)

會長 喂！大新聞、大新聞呀！

眾人 噓！

阿雲 你唔好咁大聲啦！會阻住我地研究魔法架！今次又有咩新聞呀？

會長 聽講最近有真嘅魔法出現呀！

阿古 魔法？！係咪媽呢媽呢空嗰啲呀？！

阿靈 定係溫加癲啦唯也薩嗰種魔法呀？！

阿古 或者講聲「magic！」，就變到啲野出黎嗰啲？！

阿靈 都有可能係登登登登登就變出黎嘅魔法啲！

勇者 哼！你地唔好咁傻啦！講到魔法，梗係要一班勇者歷盡千辛萬苦、斬殺巨龍，集齊七色寶石碎片然後召喚出黎嘅魔法啦！

阿古 哈哈！好笑！召喚？魔法邊到駛召喚架？

阿靈 咪係！傳說中嗰個光魔法好叻嘅魔法師話，魔法係需要 1%天賦加上 99%練習就有架啦！

阿雲 (練習念力) 你兩個細聲啲！唔好影響我啲念力能量磁場呀！

勇者 天（指住阿古）真（指住阿靈）！太天真啦！阿古、阿靈，你地都識講傳說啦，咁都好信？成日都信埋晒啲古靈精怪嘅野。至於阿雲你嘅念力啦啲，哈！就好似你個名咁，成舊雲咁囉～從來都有見你成功過～

阿雲 睇住黎啦！只要我日練夜練，總會成功嘅！

書蟲 勇者你又唔好咁講，咁又真係有好多傳說都有參考價值嘅，例如係非洲有關用變色龍製作魔藥嘅傳說，相傳係一百幾年前……

眾人 噓！

會長 大家唔好拗住，聽我講先。聽講前兩日係日落開始到結束嗰段時間，有五彩十色嘅靈光係西邊嘅覺悟山入面散發出黎，而且仲有一個身穿長袍嘅神秘人添呀！

書蟲 相傳施行大型魔法嗰陣，的確係會有靈光出現。



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

- 會長 冇錯！一定係咁！我身為我地魔法研究學會嘅會長，今次一定會去求證一下架啦！
- 阿靈 我！
- 阿古 仲有我！
- 書蟲 咁去了解一下傳說都有壞嘅。
- 勇者 到時如果遇到啲妖魔鬼怪同惡龍，就交比我幫你地擊退佢地啦！
- 阿雲 到時我啲念力都幫到手㗎！
- 眾人 你成功左先至講啦！
- 會長 （拍枱）好！咁我地就全員出動，聽日出發！
- （過場音樂）



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

第二場：出發

會長 書蟲！

書蟲 （托眼鏡）到。

會長 勇者！

勇者 （威風凜凜）到！

會長 阿古、阿靈！

阿古、阿靈 到！

會長 阿雲！（冇人應）冇冇人見過阿雲呀？

阿雲 （喘氣）黎啦黎啦！**sorry** 呀，今朝做念力練習太入神，所以遲左出門口呀！

阿古、阿靈 你終於成功左啦？！

阿雲 （興奮）一百次入面有九十九點五次都……（眾人雙眼發光望住）失敗左……（眾人無奈）

會長 唔緊要啦！陣間我地搵到真正嘅魔法師學習真正嘅魔法之後，你都一定會成功用到念力架！事不宜遲！我地出發！

（音樂）（眾人周圍望、搵人）

阿古 喂呀，行左咁耐，一個人影都唔見喎，個消息到底係咪真架？

阿靈 咪係囉！我地足足行左一個鐘啦，好似成堆盲頭烏蠅咁周圍飛黎飛去，真係會搵到魔法師咩？

勇者 唔好話魔法師呢個終極 **boss** 啦，我地連半條惡龍都見唔到呀！未消滅惡龍、未搵到寶石，點會見到魔法師學魔法呀？

阿雲 唉，一日最衰都係我，如果我學識左念力，就可以用念力去搵魔法師啦……

會長 大家唔好灰心呀，個消息話黃昏嘅時候先有靈光出現，依家距離日落仲有啲時間，我地仲有時間搵架！

書蟲 不如我地試下向西邊行過去搵啦，係好多傳說入面，西方向來都係一個神祕又吸引嘅地方，（數手指）傳說中嘅西方極樂世界、不為人知嘅太陽國度，連孫大聖都到西天取經，仲有……

阿古 咦！嗰邊好似有個人影喎！

阿靈 係喎！快啲過去睇下啦！



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

書蟲 果然係西邊出現！一定係重要人物！

勇者 等等！都有可能係妖怪黎架喎，等我打頭陣！大家跟住我後面！（眾人警戒）

（緊張音樂）